

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होर त्रऊं दिनें दे अमरीका दौरे पर रवाना।
2. जम्मू कश्मीर विधानसभा चुनां दे दुए गेड़ लेई प्रचार तेज। गृहमंत्री अमित शाह राजौरी ते पुंछ च चुनां रैलिएं लेई जम्मू च न।
3. जम्मू कश्मीर दे चसाना इलाके च सुरक्षाबलें ते आतंकवादिएं बश्कार कल संजा किश चिरे तोड़ी गोलीबारी दे बाद इलाके गी घेरियै तुपाई आली कारवाई तेज करी दित्ती गई ऐ।
4. क्रिकेट च भारत ते बंग्लादेश बश्कार जारी चेन्ई टैस्ट मैच दे अज्ज त्रीए रोज भारत अपनी दूई पारी च 81 रंजें कोला अगगे खेडोग।

<><><><><><>

PM-US

प्रधानमंत्री नरेन्द्र मोदी अज्ज अमरीका दे त्रऊं दिनें दे दौरे पर रवाना होई गे न ते इस दरान ओह उर्थें केई उच्च स्तरी बैठकां करगंन। मोदी होर विलमिंगटन च क्वाड नेताएं दे चौथे सलाना शिखर सम्मेलन च हिस्सा लैने कन्नै अपने इस दौरे दी शुरूआत करगंन। इस शिखर सम्मेलन दरान सदस्य मुख्णें आस्सेआ जलवायु परिवर्तन ते नमीं उभरदी तकनीकें सनें केई मामलें पर चर्चा कीती जाग। प्रधानमंत्री मोदी होर अमरीका दे राष्ट्रपति जो बाइडेन हुंदे सने क्वाड समूह दे होरने सदस्यें कन्नै दपक्खी बैठकां करगंन। अमरीका दे दौरे लेई रवाना होने शा पैहले जारी इक ब्यान च मोदी होरें आखेआ जे ओह अमरीकी राष्ट्रपति जो बाइडेन, प्रधानमंत्री अल्बनीज ते प्रधानमंत्री किशिदा हुंदे कन्नै क्वाड शिखर सम्मेलन च मंच सांझा करगंन। उनें आखेआ जे क्वाड समूह भारत-प्रशांत खित्ते च रमानदारी, तरक्की ते खुशहाली लेई कम्म करने आले इक महत्वपूर्ण मंचदे तौर पर उभरियै सामने आया ऐ। राष्ट्रपति बाइडेन हुंदे कन्नै बैठक बारे मोदी होरें आखेआ जे इस बैठक राएं ओह भारत ते अमरीका बश्कार कुल संसारी रणनीतिक, सांझ भ्याली गी होर तगड़ा बनाने दी कोशश करगंन। एहदे परैंत मोदी होर न्यूयार्क जांगन जित्थें कल ओह भारती समुदाय दे लोकें गी संबोधत करगंन। मोदी होर आर्टिफिशल इंटैलीजेंस, क्वांटम कम्प्यूटिंग, सेमी कंडक्टर ते जैविक तकनीकें सनें होरने अज्जे कल्लै दे खेततरें

च सैह्योग गी बढावा देने लेई प्रमुख अमरीकी कंपनिं दे मुख कार्जकारी अधिकारिं कन्नै गल्लबात करगंन। अपने दौरे दे खीरले ध्याड़े मोदी होर न्यूयार्क च संयुक्त राष्ट्र महासभा च भविक्ख सरबंधी शिखर सम्मेलन गी बी संबोधत करगंन।

<><><><><><>

J&K Campaigning

जम्मू कश्मीर विधानसभा चुनाएं दे दुए गेड़ आस्तै चुनां प्रचार जोरें शोरें कन्नै जारी ऐ। मुख धरा दे राजनीतिक नेता मतदाताएं गी अपनी बक्खी करने आस्तै जी तोड़ कोशश करा'रदे न। मतदान दे दुए गेड़ च कश्मीर संभाग दी 15 ते जम्मू संभाग दी 11 विधानसभा हल्के च वोट पोआए जांगन। इंदे च कश्मीर दे गांदरबल, श्रीलगर ते बड़गाम जिले। जम्मू दे राजौरी, पुंछ ते रियासी जिले शामिल न। जम्मू कश्मीर च कुल 87 लक्ख 9 ज्हार वोटर न जिंदे चा 44 लक्ख 46 ज्हार मर्द, 42 लक्ख 62 ज्हार महिला न। 3 लक्ख 71 ज्हार बसनीक पैहली बारी वोट पांगन ते 20 लक्ख 7 ज्हार युवा मतदाता न।

<><><><><><>

Amit Shah

वरिष्ठ बीजेपी नेता ते केन्द्री मंत्री अमित शाह होर कल संजा जम्मू पुज्जे हे। अपने त्रे दिने दे दौरे दरान मंत्री होर जम्मू खित्ते च केई चुनावी रैलिं गी संबोधत करगंन। आकाशवाणी संवाददाता नै दस्सेआ जे गृहमंत्री होर केन्द्री मी जी.के.रेड्डी ते राम माध वते चुनां प्रभारी तरुण चुग हुंदे कन्ने मिले। शाह होर अज्ज पुंछ, राजौरी ते जम्मू जिले च मेंढर, राजौरी, सुरनकोट, थन्नामंडी ते अखनूर च 5 चुनावी रैलिं गी संबोधत करगंन। 22 सितम्बर गी शाह होर नौशेहरा ते मजालता च रैलिं गी संबोधत करगंन। जम्मू कश्मीर विधानसभा चुनाएं आस्तै प्रचार दे सरबंध च एह अमित शाह हुंदा त्रीया दौरा ऐ। मतदान दे दुए गेड़ आस्तै चुनां प्रचार 23 सितम्बी गी खत्म होग।

<><><><><><>

BJP-Nadda

बीजेपी दे राष्ट्रीय अध्यक्ष जे.पी.नड्डा होर बी कल जम्मू पुज्जा'रदे न ते इस सरबंध च मंदरें दे शैहर च इक रोड शो बी आयोजित कीता जा'रदा ऐ। आकाशवाणी संवाददाता नै जानकारी दित्ती ऐ जे नड्डा होर बरनाई ते ग्रेटर कैलाश च किट्ठ गी संबोधत करगंन ते वरिष्ठ नागरिकें कन्नै रू-ब-रू होंगन। चुनाएं दे प्रचार आस्तै नड्डा हुंदा एह जम्मू कश्मीर दा पैहला दौरा ऐ। रक्षामंत्री राजनाथ सिंह होर बी 22 ते 25 सितम्बर गी

आवा'रदे न। पुंछ, सुरनकोट ते जम्मू च सिंह होर चुनावी रैलिंग गी संबोधत करगंन। उधमपुर च 25 सितम्बर गी उंदा चुनावी रैली करने दा कार्यक्रम ऐ।

<><><><><><>

Rahul Gandhi

कांग्रेस नेता ते विपक्षी दल दे नेता राहुल गांधी होर 23 सितम्बर गी पुंछ ते श्रीनगर च चुनाव प्रचार आस्तै रैलियां करगंन। आकाशवाणी संवाददाता नै दस्सेआ ऐ जे गांधी होर सोमवारें जम्मू पुज्जगंन ते कांग्रेस-नैशनल कांफ्रेंस दे मेदवार आस्तै सुरनकोट च पैहली चुनावी रैली गी संबोधत करगंन। एह्दे मगरा राहुल गांधी हुंदा बक्ख-बक्ख क्षेत्रें दे पेशेवरें कन्नै जम्मू च मिलने दा कार्यक्रम बी ऐ।

<><><><><><>

Farooq

नैशनल कांफ्रेंस दे अध्यक्ष डॉ. फारूक अब्दुल्ला होरें बीजेपी पर पाकिस्तान दी मदद ते जम्मू कश्मीर च जनमत किट्टे करने दे हिमायतिंग दा समर्थन करने दा आरोप लाया ऐ। डॉ. अब्दुल्ला होरें एह ब्यान कल मीडिया कर्मिगं कन्नै गल्लबात करदे होई दित्ता। उनें एह ब्यान बीजेपी नेतागं दे उस आरोप दे परते च दित्ता जेह्दे च पाकिस्तान ते जम्मू कश्मीर मुखधारा दी पार्टिगं बशकार इक गइजोड़ बारे आखेआ गेआ जेह्दे च नैशनल कांफ्रेंस ते कांग्रेस शामिल न। एह आरोप पाकिस्तान दे रक्षा मंत्री ख्वाजा आसिफ हुंदे ब्यान मगरा लाया गेआ जेह्दे च उनें कथित तौर पर दावा कीता ऐ जे नैशनल कांफ्रेंस ते कांग्रेस धारा 370 ब्हाल करने आस्तै किट्टे रलियां न।

<><><><><><>

Announcement in Dogri

आकाशवाणी जम्मू दा क्षेत्रीय समाचार एकांश 18 सितंबर, 2024 कोला त्रऊं गेड़े च होआ करदे विधानसभा चुनाव 2024 दे सिलसिले च जम्मू संभाग दे सब्बने 10 जिले दे बारे च विशेष जिला प्रोफाइल कार्यक्रमें दी इक्क श्रृंखला प्रसारित करार दा ऐ। इस सिलसिले च अजें तोहड़ी, डोडा, किश्तवाड़, रामबन ते रजौरी जिलें पर आधारित कार्यक्रम बी प्रसारित कीते जाई चुके दा ऐ ते हुन औंदी 22 सितम्बर गी पुंछ जिले पर आधारित विशेष कार्यक्रम दा प्रसारण कीता जाहग। एह्दे परैन्त इस्सै म्हीने दी 24, 26, 27, 28 ते 30 सितंबर गी बडले 8:45 बजे बाकी रौंहदे जिलें पर आधारित कार्यक्रम बी प्रसारित कीते जागन जिंदे च जम्मू संभाग दे इनें जिले दा ऐतिहासिक, पर्यटन ते राजनीतिक अवलोकन पेश कीता जाग स केंद्र शासित प्रदेश च होआ करदे विधानसभा चुनाव दे मद्देनजर, शुरू कीती गेदी इस श्रृंखला दा मकसद आकाशवाणी जम्मू दे श्रोतागं लेई जम्मू

संभाग दे सब्बने 10 जिले दे हर इक्क विधानसभा क्षेत्र दे बारे च महत्वपूर्ण जानकारी प्रसारित करना ते उने गी जागरूक रखना ऐ।

<><><><><><>

Reasi Encounter

सुरक्षा बलें रियासी जिले दे चसाना माहोर इलाके गी घेरियै तुपाई अभियान चलाए दा ऐ। कज संजा उत्थें उत्थें आतंकवादिएं कन्नै किश चिरै लेई गोलीबारी होई ही, जेहदे बाद सुरक्षाबलें इलाके गी घेरी लैते दा ऐ। साढ़े रियासी आले जिला संवाददाता देविंदर ठाकुर नै जानकारी दित्ती ऐ ते चसाना दे शिकारी इलाके च जारी इस सांझ अभियान च पुलस, फौज ते सीआरपीएफ शामिल न। अज्ज बडलै उत्थें होर सुरक्षाबल सद्दे गे न ते होर ब्योरे गी बलगेआ जा'रदा ऐ।

<><><><><><>

BSF Mishap

कश्मीर घाटी दे बडगाम जिले च इक बस दे सड़कै परा रूलकियै खड्डै च जाई पौने कारण एहदे च सुआर बीएसएफ दे घट्टोघट्ट त्रै कर्मिएं दी जान गई ऐ ते 2 दर्जन घायल होई गे न। अधिकारिक जानकारी मूजब विधानसभा चुनां दे दुए गेड़ दे मतदान सरबंधी ड्यूटी पर कराए पर कीती दी इक सिविल बस च लेता जा'रदा ऐ जिस दरान जिले दे ब्रेल वटरहाल थाहर एह गड्डी सड़कै परा रूलकियै खड्डै च जाई पेई। जेहदे कारण 3 बीएसएफ दे जवान शहीद होई गे ते दऊं दर्जन कोला मते घायलें गी बडगाम ते श्रीनगर च अस्पतालें च पुजाया गेआ जित्थें उंदा इलाज चलै करदा ऐ।

<><><><><><>

Food Safety

केन्द्र शासत प्रदेश जम्मू कश्मीर गी खाद्य सुरक्षा सूचकांक 2023-24 च राज्यें ते केन्द्र शासत प्रदेशें च त्रीह थाहर हासल होई ऐ। खाने पीने आली चीजें दी सुरक्षा ते मयार पर तक्क रखने सरबंधी भारतीय प्राधिकरण एफएसएसएआई आस्सेआ हर ब'रे एह पुरस्कार बक्ख-बक्ख राज्यें ते केन्द्र शासत प्रदेशें गी दित्ते जंदे न। एह पुरस्कार केन्द्र सेहत ते परिवार कल्याण मंत्री जे.पी.नड्डा होरें नमीं दिल्ली च आयोजित केन्द्री उपभोक्ता मामले, खुराक ते सार्वजनिक बंड बिक्री सरबंधी मंत्री प्रहलाद जोशी हुंदी मजूदगी च भेंट कीते गे।

<><><><><><>

Cricket India Bangladesh

चेन्नई च बंगलादेश कन्नै पैहले क्रिकेट टैस्ट मैच दे त्रीए दिन अज्ज भारत त्रै विकेटें दे नुकसान पर 81 रंजें थमां अगगे खेडोग। चेन्नई दे एम.ए.चिदंबरम स्टेडियम च अज्ज त्रीए दिन दा मैच किश देप परैत साढ़े 9 बजे शुरू होग। भारत गी अजें तोड़ी 308 रंजें दी बढत हासल होई चुकी दी ऐ। शुभमन गिल 33 ते ऋषभ पंत 12 ज बनाइयै नाबाद न। एहदे शा पैहले भारत दी पैहली पारी दे 376 रंजें दे परते च कल बंगलादेश दी पूरी टीम 149 रंजें पर आउट होई गई। पैहली पारी दी बिनाह पर भारत गी 227 रंजें दी बढत मिली। भारत दी बक्खी थमां जसप्रीत बुमराह नै 4, जदके मोहम्मद सिराज, आकाशदीप ते रविन्द्र जडेजा नै 2-2 विकेटां हासल कीतियां।

<><><><><><><>

AP-Ladoo

केन्द्र ते तिरुपति दे लड्डू च मिलावट दे इल्जाम पर आंध्रप्रदेश सरकार थमां रिपोर्ट मंगी ऐ। सेहत मंत्री जे.पी. नड्डा होरें नमीं दिल्ली च कल आखेआ हा जे उनें आंध्रप्रदेश दे मुखमंत्री एन.चन्द्रबाबू नायडू हुंदे कन्नै गल्लबात करियै इस बारे रिपोर्ट मंगी ऐ। उनें आखेआ जे सरकार मामले दी जांच करियै सेई कारवाई करोग। केन्द्र खाद्य मंत्री प्रहलाद जोशी होरें आखेआ ते तियपति मंदर दे लड्डूएं च जानवरें दी चर्बी दी मजूदगी गंभीर मसला ऐ। एह मुद्दा आंध्रप्रदेश दे मुखमंत्री होरें चुक्केआ हा। जोशी होरें आखेआ जे इस मामले दी तफसीली जांच होनी लोड़चदी ते दोशिएं गी सजा होनी चाहिदी। खाद्य प्रसस्करण उद्योग मंत्री चिराग पासवान होरें नमीं दिल्ली च आखेआ जे खाने आली चीजें च मिलावट करने आले कुसा बी शख्स गी बक्शोया नेई जाग। राष्ट्री डेयरी विकास बोर्ड दी प्रयोगशाला नै तिरुपति दे श्री वेंकेटेश्वर स्वामी मंदर च प्रसाद दे रूपे च चढ़ाए जाने आले लड्डू बनाने आले घ्यो च जानवरें दी चर्बी दी मजूदगी दी तस्दीक कीती ऐ।

<><><><><><><>